



Bild: Annika Gandelheid, iStock, Getty Images Plus

Lustige Versli für Samichlaus, Schmutzli und Esel

Sechs Samichlaus-Versli

Dis Gwüsse

Wenn ich dich im Migros gseh
im Warehus, statt duss im Schnee
im Auto uf de Autobahn
mit em Handy i de Bahn....
denn frög i mi wie`s dir so gaht
und öb Dich nöd dis Gwüsse plagt...?!
Din Schmutzli mit de Zigarett
find ich au nüm so en Nette...
und ohni Esel, ohni Glogge
hausch mi nüme us de Socke !!!

Sami Niggi Nöggi

Sami Niggi Nöggi
es Manderindli wötti
es Schöggeli dezue
denn lahn i dich in Rueh!

Modern

Säg häsch du jetzt au es Handy
surfsch du scho im Internet?
Nöd das ich das so blöd fändi...
s'isch nur, das ich's gern wüsse wett.
Ich würd dich denn im Netz go sueche,
logge mich den bi dir i,
denn chönt ich dich s'ganz Jahr erreiche
und mit dir in Verbindig si!

Ehrlich

Ich putz nöd gern d Chuchi,
hilf nöd gern im Garte,
bin ungeduldig
und ha Müeh mit warte.
Ich bi nöd so flissig,
fast eher chli ful...
gäll liebe Chlaus
das finsch nöd so cool!
Ich bi nöd de Schnellscht,
scho gar nöd de Bescht,
bestah no lang nöd jede Tescht.
Lauf öpe mit de Schueh is Hus..
und mis Zimmer gseht selte ufgrumt us!
Ich weiss das fahrt dir sicher i...
doch bin ich wenigstens ehrlich gsi!!

Z'chli

Für es Versli bin ich no z'chli.

Gäll Samichlaus, das lüchtet dir i!

Muskle

Lueg mal mini Muskle a,

ich wird emal en starche Maa!

Denn hilf ich dir bi Schnee und Räge,

dis Säckli zu de Chinde z'träge!

Versli für Schmutzli

Schmutzli – das gaht nöd!

Schmutzli, - lueg dich im Spiegel a!

So chasch doch nöd zu de Chinde gah!

Dis Gsicht isch rabeschwarz wie Aesche...

wotsch dich nöd zerscht emal go wäsche?

Au din Bart würd`s guet verträge,

wenn ihn besser würdisch pflege!

Wotsch bi eus nöd e Duschi neh?

Denn wirsch nachher sicher besser usgseh!

Versli für den Esel

Es Versli für dich

Liebs Eseli, - warum gits chum es Versli für dich.

Du bisch doch au wichtig und eus Chinde nöd glich.

Ich chum drum ganz näch a dis Ohr

und flüstere dir das Versli vor.

Ich strichle dis Fell mit mine Hand,

Du bisch de beshti Esel im ganze Land

Alle Versli: Copyright Christian Hablützel, aus dem Buch: «De Samichlaus findet`s en Hit»